

HAGGAI

Inleiding

Naam van die boek

Die boek *Haggai* is vernoem na die profeet Haggai. Sy naam beteken heel moontlik "feestelik" of "die een wat op die fees gebore is".

Tyd en plek van ontstaan

Volgens die datums in die boek het Haggai vanaf 29 Augustus tot 18 Desember 520 vC in Jerusalem opgetree. Koning Kores van Persië het die Jode toegelaat om in 538 vC na die beloofde land terug te gaan. Ten minste drie groepe het oor 'n aantal jare die geleentheid gebruik. Die eerste groep het uit ongeveer 50 000 Jode bestaan en onder leiding van hulle leiers, Sesbassar en Serubbabel, in die beloofde land aangekom. Esra het die tweede groep van 1 700 mans saam met hulle vrouens en kinders in 458 vC gelei. Nehemia en Sagaria het die derde groot groep van 42 000 Israeliete in 444 vC teruggeneem. Haggai en Sagaria het waarskynlik deel uitgemaak van die teruggekeerdes onder leiding van Sesbassar.

Skrywer

Haggai het heel moontlik die profetiese boek geskrywe tussen 520 vC en 515 vC, die jaar wat die teruggekeerdes die tempel voltooi het. Hy was die eerste profeet ná die ballingskap. Daar is nie baie bekend oor sy agtergrond nie.

Lesers

Haggai roep die teruggekeerde volk op om aan die Here gehoorsaam te wees en die verwoeste tempel te herbou. Hy was baie spesifiek oor die lesers in sy profesieë. Die eerste profesie was aan die hoëpriester Josua gerig (1:1). Die tweede profesie was gerig aan die goewerneur van Juda, Serubbabel, die hoëpriester Josua en almal wat van die volk oorgebly het (2:1). Die derde profesie was gerig aan die priesters (2:11), en die vierde aan Serubbabel, goewerneur van Juda (2:22).

Kenmerke

Die boek *Haggai* is die tweede kortste boek in die Ou Testament naas *Obadja*. Die skrywer gebruik eenvoudige taal en praat op die man af. Die inleidende gedeeltes van die boek *Haggai* is prosa, en die profesieë grotendeels poësie.

Temas en motiewe

Die doel van die profesieë was om die Jode te motiveer om die tempel te herbou. Deur dit te doen, het hy ook die mense gekonfronteer met hulle eie misplaaste prioriteite. In die ontwikkeling van die profesieë is 1:4 'n belangrike vers.

Haggai beskou die tempel as God se woonplek op die aarde, as middelpunt vir aanbidding en as simbool van die HERE se grootheid. Die tempel was vir hom belangriker as 'n paleis, en die priesters as die prinse. Ander belangrike temas is reinheid as voorvereiste tot aanbidding, profesie as goddelike openbaring, goddelike soewereiniteit, menslike verantwoordelikheid en 'n toekoms vir die ryk

van Dawid, verbind aan Serubbabel.

Opbou van die boek

1:1-15 Die tempel moet herstel word

2:1-9 Die nuwe tempel

2:10-19 Die volk word tereggewys

2:20-23 Die belofte aan Serubbabel

1

Die tempel moet herstel word

¹ In die tweede regeringsjaar van koning Darius, op die eerste dag van die sesde maand, was dít die woord van die HERE deur die diens van die profeet Haggai tot Serubbabel, die seun van Sealtiel* en goewerneur van Juda, en tot Josua, die seun van Jehosadak en hoëpriester: ² "So sê die HERE, die Heerser oor alle magte, " 'Hierdie volk sê die tyd is nog nie ryp om die HERE se huis te herbou nie.' ³ Dit is die woord van die HERE deur die diens van die profeet Haggai, ⁴ 'Is die tyd dan wel vir julle ryp om in huise met plafonne te woon, terwyl hierdie huis^a 'n bouval is?'

⁵ "Daarom, so sê die HERE, die Heerser oor alle magte, 'Neem ter harte wat julle beleef het.

⁶ " 'Julle het baie gesaai, maar dit het min opgelewer;
julle eet, maar word nie versadig nie;
julle drink, maar raak nie vrolik nie;

*1:1 Hag 2:23; 1 Kron 3:17; Esra 3:2; Neh 12:1

^a1:4 *hierdie huis*: Die tempel van die Here.

julle trek aan, maar word nie warm nie.

Wie homself uithuur, doen dit vir 'n beursie vol gate.'

⁷ "So sê die HERE, die Heerser oor alle magte, 'Neem ter harte wat julle beleef het.

⁸ " 'Gaan teen die berge uit,
bring hout en herbou my huis;
dit sal vir My vreugde verskaf
en Ek sal daardeur verheerlik word.'
Dit is wat die HERE sê.

⁹ " 'Julle verwag baie,
maar kyk, julle kry bloedweinig.
As julle iets huis toe bring,
blaas Ek dit weg.

" 'En waarom? Dit is die uitspraak van die HERE, die Heerser oor alle magte: Omdat my huis 'n bouval is, terwyl elkeen van julle rondhardloop vir sy eie huis.

¹⁰ " 'Daarom het die hemel bo julle die dou teruggehou en die aarde sy opbrengs. ¹¹ Ek het droogte laat uitbreek oor die land en oor die heuwels, oor die graan, die jongwyn en die olyfolie, oor alles wat die grond oplewer; oor mens en dier en alles wat met moeite tot stand gebring is.' "

¹² Serubbabel, seun van Sealtiel, en Josua, seun van Jehosadak en hoëpriester, en almal wat oor was van die volk, het geluister na die

stem van die HERE hulle God en ag geslaan op die woorde van Haggai, die profeet, toe die HERE hulle God hom gestuur het. Die volk was bang vir die HERE, ¹³ maar Haggai, die boodskapper van die HERE, het in opdrag van die HERE vir die volk gesê: " 'Ek is by julle!'" Dit is die uitspraak van die HERE." ¹⁴ Toe het die HERE Serubbabel, seun van Sealtiel en goewerneur van Juda, en Josua, seun van Jehosadak en hoëpriester, en almal wat oor was van die volk, begeester. Hulle het begin om die werk aan die huis van die HERE, die Heerser oor alle magte, hulle God, aan te pak.

¹⁵ Dit het gebeur op die vier-en-twintigste dag van die sesde maand, in die tweede regeringsjaar van koning Darius.

2

Die nuwe tempel

¹ Op die een-en-twintigste dag van die sewende maand was dít die woord van die HERE deur die diens van die profeet Haggai: ² "Sê vir Serubbabel, seun van Sealtiel en goewerneur van Juda, en vir Josua, seun van Jehosadak en hoëpriester, en vir dié wat oorgebly het van die volk, ³ 'Wie onder julle het oorgebly wat hierdie huis van die HERE in sy vroeëre prag gesien het? En wat sien julle nou daarvan? Lyk dit nie na niks teen die vorige een nie?' ⁴ Daarom, hou moed, Serubbabel,' is die uitspraak van die HERE. 'Hou moed Josua, seun van Jehosadak en hoëpriester! Hou moed, volk van die land,' is die uitspraak van die HERE. 'Werk, want Ek is by julle,' is die uitspraak van die HERE, die Heerser oor alle magte. ⁵ 'Dit is die ooreenkoms wat Ek met julle gesluit het toe julle uit Egipte getrek het: My Gees sal

*1:13 Matt 28:20

altyd in julle midde bly. Moenie bang wees nie.' "

⁶ Die HERE, die Heerser oor alle magte het immers gesê: "Nog een keer, binnekort, sal Ek die hemel en die aarde en die see en die droë grond laat bewe.* ⁷ Ek sal al die nasies laat bewe en hulle sal kom met al hulle skatte en Ek sal hierdie huis met rykdom vul," sê die HERE, die Heerser oor alle magte. ⁸ "Aan My behoort die silwer en aan My behoort die goud," is die uitspraak van die HERE, die Heerser oor alle magte. ⁹ "Die prag van hierdie huis sal groot wees, nog groter as tevore," sê die HERE, die Heerser oor alle magte. "En op hierdie plek sal Ek vrede gee," is die uitspraak van die HERE, die Heerser oor alle magte.

Die volk word tereggewys

¹⁰ Op die vier-en-twintigste dag van die negende maand, in Darius se tweede regeringsjaar, was dit die woord van die HERE tot die profeet Haggai: ¹¹ "So sê die Here, die Heerser oor alle magte, 'Vra vir die priesters leiding hieroor: ¹² As iemand heilige vleis* in die vou van sy bokleed dra en hy raak met die vou van sy kleed aan brood of gekookte kos, of wyn of olyfolie, of enige kos, word dit dan heilig?' " Die priesters se antwoord was: "Nee." ¹³ Haggai vra toe: "As iemand wat onrein is deur aanraking met 'n lyk* aan enige van hierdie dinge raak, is dit dan onrein?" Die priesters het geantwoord: "Dit sal onrein wees." ¹⁴ Hierop sê Haggai toe:

" 'Dit is hoe hierdie volk is,

*2:6 Matt 24:29; Luk 21:26; Heb 12:26

*2:12 *heilige vleis*: Lev 6:20

*2:13 *iemand ... lyk*: Num 19:13

ja, dit is hoe hierdie nasie voor My is,
en ook al die werk van hulle hande.*
Alles wat hulle daar offer, is onrein.'
Dit is die uitspraak van die HERE.

¹⁵ "Daarom dan, neem voortaan ter harte hoe dit met julle gegaan het^b voordat klip op klip in die tempel van die HERE gelê is. ¹⁶ As iemand na 'n koringmied van twintig mate gegaan het, was daar maar net tien! As hy na die parskuip gegaan het om vyftig mate wyn uit die kuip te skep, was daar maar net twintig. ¹⁷ Ek het julle getref met skimmel en witroes en hael, ja, al die werk van julle hande, maar julle wou nie na My terugkeer nie," is die uitspraak van die HERE.

¹⁸ "Neem ter harte hoe dit van vandag af gaan wees, van die vier-en-twintigste dag van die negende maand af, die dag waarop die fondament van die tempel van die Here gelê is; ja, neem dit ter harte. ¹⁹ Is daar nog saad in die stoorkamer? Die wingerd, die vyebome, granate en olyfbome het nie eers gedra nie! Van vandag af sal Ek julle seën."

Die belofte aan Serubbabel

²⁰ Dit is die tweede woord van die HERE tot Haggai op die vier-en-twintigste dag van die maand:

²¹ "Sê vir Serubbabel, die goewerneur van Juda,
'Ek gaan die hemel en die aarde laat bewe.*

*2:14 *werk ... hande:* Hag 1:11

^b2:15 *hoe dit ... het:* Volgens die Septuaginta by 2:15-16.

*2:21 Matt 24:29; Luk 21:26

²² Ek gaan die koninklike trone omverwerp
en die nasies se magtige koninkryke verwoes.
Ek gaan die strydwaens
met hulle drywers omkeer;
die perde sal neerval
en die ruiters sal mekaar met die swaard ombring.' "

²³ Die uitspraak van die HERE, die Heerser oor alle magte is:
"Op daardie dag sal Ek jou, my dienaar, Serubbabel, seun van
Sealtiël, neem, is die uitspraak van die HERE, en Ek sal jou soos 'n
seëlring maak^c omdat Ek jou uitverkies het." Dit is die uitspraak van
die HERE, die Heerser oor alle magte.

^c2:23 *Ek sal ... maak*: Verwys na die koningskap oor Jerusalem en Juda, vgl Jer 22:24,30.